

## ALAHADY FAHA 33 MANDAVANTAONA - B



**« Dia ho hita amin'izay ny Zanak'olona avy eo ambonin'ny rahona amin-kery lehibe sy voninahitra » (Mk. 13: 26)**

Ry Kristianina havana, tamin'ny Alahady faha 32 mandavantaona lasa teo ny fampianarana azontsika dia ny hoe izay tia mahafoy, fototry ny fiainantsika sy ny maha zanak'Andriamanitra antsika ny fahafoizana, fototry ny maha Kristianina antsika ny fahafoizana eo amin'ny mpiara belona amintsika, fototry ny maha mpanorina antsika EOY sy ETA. Ao anatin'izao fiomanantsika amin'ny hasim-pinoana ary amin'izao Alahady izao mialoha ny fankalazana an'I Kristy mpanjaka no nofidin'ny

Papa manokana ny Alahady faha 33 mandavantaona hahatsiarovana ny asa fanasoavana an'ireo mahantra.

Indrisy fa mihamaro ny mahantra eto amintsika ka inty andro anio ity, izay andro hankalazantsika sy hirosoantsika bebe kokoa amin'ny asa fanasoavana an'ireo voahiliky ny

fiaraha-monina. Ao anatin'izao volana novambra hahatsiarovantsika ireo havantsika nialoha lalana antsika ary indrindra manomana antsika amin'ny famaranana ny taona litorjika dia tarihin'ny Eglizy isika hibanjina ny fiainan-koavy, izany no tian'ireo vakiteny asongandina sy fampianaram-pinoana ho antsika. Hiverina tokoa i Kristy ary rehefa tonga ny faran'izao rehetra izao, farandro no filazantsika azy fa tsy misy mahalala ny ora hahatongavan'izany. Misy ny milaza mahita aloha ka manambara ny

Vakiteny I : Dan. 12, 1-3

Tononkira : Salamo 15

Vakiteny II : Heb. 10, 11-14. 18

Evanjely : Mk. 13, 24-32

daty nefa mazava ny tenin'i Kristy fa na izy aza tsy mahafantatra an'izany. Ny zavatra tena azo itokisana dia tsy maintsy misy izany farandro izany ary hiverenan'i Jesoa Kristy amin'ny fomba manetriketrika, izany no antony no ankalazantsika amin'ny famaranana ny taona litorjika, ny fankalazana dia sady fahatsiarovana (memorial fa tsy anniversaire) no hivelomana noho ny fanentanan'ny fanahy masina ka efa mivelona sahady an'izay ankalazaina isika, izany no mahatonga antsika mankalaza an'I Kristy mpanjaka amin'ny heriny androany ka homanin'ny Eglizy isika haroson'ny antsika ny vakiteny manentana ho an'izany amin'izao Alahady faha 33 mandavantaona izao.

Ny bokin'i Daniely mpaminany no milaza ny fiafarana izany, *“Amin'izany andro izany, hitsangana i Misely ilay filoha ambony, izay miandany amin'ny zanaky ny firenenao, ka amin'izany no ho androm-pahoriana tsy mbola nisy toa azy, hatrizay nisian'ny firenena, ka hatramin'izany andro izany.”*, mety mampatahotra tokoa ny fiheverana izany farandro izany fa aoka hahatoky isika na dia eo aza ny zavamisy sarotra iainantsika. Tamin'ny fotoana nanoratan'i Daniely io boky io dia lavitra ny fanantenana ny vahoakan'Israely satria teo ambany fifehezan'ny grika izy fa nahatoky an'Andriamanitra.

*“Amin'izay dia ho voavonjy ny firenenao, dia izay rehetra hita voasoratra eo amin'ny boky. Ary maro amin'ireo mandry ao amin'ny vovo-tany no hifoha: ny sasany ho amin'ny fiainana mandrakizay; fa ny sasany ho amin'ny latsa amam-panariana mandrakizay. Izay ho efa hendry hamirapiratra hoatra ny famirapiraty ny lanitra; ary izay ho efa nitarika ny maro ho amin'ny fahamarinana, ho tahaka ny kintana mandrakizay.”*

Ho an'izay miombona tanteraka amin'Andriamanitra dia hanana ny fiainana fa izay varimbariana kosa amin'ny rendrarendra ety ivelany tsy ho ao anatin'izay hafaliana mandrakizay izay hahasambarana izay, izany no tian'ny vakiteny voalohany ambara.

Ny lalana izany dia fahafoizana, izay tia mahafofy, amin'ny alalan'ny fanompoana no hanehoana ny fitiavana, izany no hametrahan'ny Papa inty andro anio inty ho fanompoana, hikatsahana ny soa ho an'ny hafa, handresena ny ratsy mikiky ny tontolo iainana sy ny tontolom-piainana ary ny tontolom-pinoana ka manapotika ny fivelarana amin'ny maha olona azy sy amin'ny olona rehetra, noho ny fitiavan-tena dia potika ny fiainantsika. Andron'ny fametrahana ny rariny sy ny hitsiny ihany koa izao andro fanompoana izao. Ny fanompoana dia ny fikatsahana ny marina mandrakariva sy fametrahana ny rariny sy ny hitsiny, izany no hahafahantsika miaina ny fandriampahalemana sy ny fihavanana marina.

Izany no ampianarin'I Jesoa amintsika ao amin'ny Evanjely, ho avo tokoa ny zanak'olona ary hanangona ny olom-pinidiny izy avy amin'ny vazan-tany efatra, fahasoavana ho antsika ny

fahatongavan'i Jesoa ka tsy tokony hampatahotra antsika, rehefa tonga izany fotoana izany araky ny evanjely vao norenesintsika **teo** dia aoka isika hahatoky ny famindrampon'Andriamanitra ary hizara ny famindrampon'Andriamanitra eo amin'ny manodidina antsika. Tsy ho hisy ny fihavanana na ny fahandriampahalemana raha tsy manjaka ny famindrampo. Izany no dikan'ny fanompoana amintsika. Aoka ary hahatoky ny famindrampon'Andriamanitra isika, **hiomana** bebe kokoa hatrany, fantantsika fa mizotra mankany amin'ny fiverenan'i Jesoa ny fiainantsika na dia araky ny naverimberina fa ny Ray ihany no mahalala ny andro sy ny ora hahatongavan'izany araky ny voalazan'i Jesoa . Noho ny tsy fahafantarana ny andro àry aoka isika ho vonona lalandava, midika fanompoana izany satria vonona mandrakariva isika ka na amin'ny fotoana fahafiry dia vonona. Mivavaka no dikan'ny vonona, izay manambara fa miombona amin'i Jesoa ny fiainantsika ka ny fiainan'i Jesoa zary fiainantsika, izany no fiomanana sy angatahin'i Jesoa amintsika raha milaza izy fa miambena lalandava fa tsy fantatrareo ny fotoana hiavian'ny zanak'olona. Aoka isika hiomana tokoa amin'ny alalan'ny fivavahana fa tsy hiandry andro lava, aoka isika tsy ho variana ka hanadino ny tena fototra maha zanak'Andriamanitra sy maha olona araiky antsika ka ho taranaka mpanorina tokoa isika *“Lazaiko marina aminareo fa tsy ho lany ity taranaka ity mandra-pahatongan'izany rehetra izany”*.

Ho taranaka mpanorina tokoa isika ka hahay hampitraotra ny finoana sy ny fiainana andavanvandro, izany no antitranterin'ny mpanoratra ho an'ny taratasy Hebrio ao amin'ny vakiteny faharoa raha manohy ny fandalinana izy dia milaza fa ny fiainantsika ho zary sorona ho an'Andriamanitra ka zary sorona tahaka nataon'i kristy izay nampihavana antsika amin'Andriamanitra, sorona famelan-keloka, sorona manamasina antsika. Aoka isika ho vonona hanolotra ny fiainantsika ho sorona, izany hoe zary fiainana misy an'Andriamanitra ny fiainantsika na dia tsy lavorary aza.

Ry Jesoa Tompo ô, misaotra anao izahay amin'ny fanambaranao fa ho tonga tokoa ny farany ary ianao ho avy eto aminay ka enga anie Andriamanitra Ray handrotsaka ny fahasoavany sy ny ~~fanahiny~~ **Fanahy** amin'ny fiainanay mba hahatonga ny fiainanay tokoa ho fiainana misy anao ka hitoetra ao aminao izahay ary ianao hitoetra ao aminay sady manomana ny fiainan-koavy izahay no hampamokatra **ity** fiainanay ity mba ho fiainana mendrika ny maha zanak'Andriamanitra. Ny herin'ny fahasoavanao sy ny herin'ny **Fanahy Masina** anie hanampy anay hanatanteraka ny adidinay eo amin'ny fiainanay andavanandro izay hiomananay ny fiainan-koavy ka tsy hampatahotra anay ny hiandry ny ora hiverananao na dia tsy fantatray aza. Amen

Mompera Arseveka Mgr Benjamin Ramaroson